


二十二史攷異

宋史八之十三

七十四之九




漢書門類			
九	三	〇	三
號	函	架	冊
二	〇	一	〇

內閣文庫			
九	三	〇	三
號	函	架	冊
二	〇	一	〇

內閣文庫	
番號	漢 9303
冊數	20(16)
函號	298 2





宋史八

淺草文庫

廿二史攷異七十四

錢大昕學

宰輔表一

建隆元年二月吳廷祚自樞密使加同中書門下平章

事本紀作同中書門下二品廷祚父名璋故改平

章事為二品後晉天福四年升中書門下平章事為

正一品故也表書平章事誤三年依前同中書門下平章事亦當作同中書



門下二品

八月戊子 宰輔編年錄作甲申

太平興國四年正月石熙載自樞密直學士遷簽書樞

文是

宋史八



密院事 簽書當作簽署張齊賢王沔楊守一張遜
馮拯陳堯叟韓崇訓馬知節曹瑋王德用諸人皆除
簽署或同簽署史家避諱追改爲書字又攷是時熙
載寄祿官兵部員外郎四月除副樞進官給事中十
月遷刑部侍郎表失書

八年正月戊寅樞密使曹彬以天平軍節度使 此事
太宗紀失書

雍熙二年十二月柴禹錫自樞密副使以右驍衛大將
軍免 此事太宗紀失書

四年四月張宏自樞密副使以御史中丞免 此事太

宗紀失書

端拱元年二月楊守一自內客省使遷宣徽北院使簽
書樞密院事九月楊守一卒 此事太宗紀失書

淳化二年三月辛仲甫自給事中參知政事以工部尚
書知陳州 此事太宗紀失書

四月張宏自樞密副使以吏部侍郎免 此事太宗紀
失書

九月王顯自樞密使責授隨州刺史崇信軍節度觀察
處置等使 按節度使例兼觀察處置等使及本州
刺史此文但當云責授崇信軍節度使餘皆可省

五年九月寇準自守同知樞密院事除參知政事 按
準於淳化二年罷樞府安得更云守同知樞密院事
此必誤也据宰輔編年錄是年準自左諫議大夫知
青州召當云守左諫議大夫也

至道元年正月趙昌言自參知政事以戶部侍郎知鳳
翔府 此事太宗紀失書

三年六月錢若水自同知樞密院事以祕書院學士免
按祕書省無學士之稱亦無院名據本傳乃集賢
院學士也若水時官工部侍郎史亦失書

咸平三年二月王顯自樞密使以山南東道節度使同

中書門下平章事免 此事真宗紀失書

景德四年七月馮拯自參知政事以刑部尚書知河南
府兼西京留守 此事真宗紀失書

五年九月戊子馬知節自檢校太保宣徽北院使簽書
樞密院事進樞密副使同日參知政事趙安仁以兵
部侍郎仍領玉清昭應官使免 此二事真宗紀失
書

七年六月馬知節自檢校太傅宣徽北院使以潁州防
禦使免 此事真宗紀失書

九年正月張旻自侍衛馬軍副都指揮使威塞軍節度

使檢校太保加宣徽南院使兼樞密副使 此事真宗紀失書

九月丙辰丁謂自參知政事以平江軍節度使免 當作甲辰

王曾自翰林學士兵部侍郎知制誥加左諫議大夫張知白自諫議大夫權御史中丞加給事中並除參知

政事 此九月丙午事也表失書日又據本紀及宰輔編年錄同日除參政者尚有陳彭年一人彭年班

在曾與知白之前當是表有脫文爾 當云九月丙午陳彭年自翰林學士工部侍郎知制誥兼龍圖閣學士加刑部侍郎除參知政事依前會靈觀使另為一行列於王曾諸

人之前

任中正自樞密直學士給事中權知開封府加工部侍郎遷樞密副使 此事真宗紀失書

天禧元年七月王旦自太尉兼侍中同中書門下平章事以玉清昭應官使免 此事真宗紀失書

八月張旻自樞密副使以河陽三城節度使免 此事真宗紀失書

二年六月曹利用自檢校太尉宣徽北院使同知樞密院事進知樞密院事 此事真宗紀失書

十二月張知白自參知政事以刑部侍郎翰林侍讀學

士知天雄軍 此事真宗紀失書

四年八月錢惟演自翰林學士刑部侍郎知制誥遷樞密副使 此事真宗紀失書

九月周起自禮部侍郎樞密副使以戶部侍郎知青州曹瑋自簽書樞密院事以宣徽南院使出爲環慶路馬步軍都部署 此二事真宗紀失書

十一月戊辰檢校太尉同平章事丁謂太子少傅同平章事李迪忿爭于上前謂以戶部尚書知河南府迪以戶部侍郎知鄆州 按是日謂迪同罷次日詔謂赴中書視事如故又明日進謂左僕射太子少師表

但書罷而不書復留及加官此脫漏之甚矣

宰輔表二

景祐四年初呂夷簡王曾不協曾言夷簡招權交論于上前參知政事宋綬善夷簡樞密副使蔡齊頗附曾此敘諸臣罷免之由當書於本傳表惟記拜罷官位月日不應贅出

寶元元年先是右司諫韓琦屢言宰執非才 此語亦可省

二年十月丁酉 仁宗紀作十一月此誤編年錄亦云十一月
十月壬寅 仁宗紀作十一月此誤

慶歷四年陳執中除參知政事蔡襄孫甫等言其剛愎不可任上不聽 蔡襄以下皆可省

五年先是樞密副使韓琦上疏論富弼不當輕罷不報董士廉又訟水洛城事 此語皆可省表無敘事之例卷內似此者甚多略舉數條以見其繁而無當也皇祐元年是歲賈昌朝自山南東道節度使同平章事安國公判鄭州依前尚書右僕射觀文殿大學士判尚書都省 按昌朝於前二年罷相此判尚書都省非執政之職不當濶入

嘉祐四年五月田況自樞密使以尚書右丞觀文殿學士兼翰林侍讀學士提舉景靈宮事 此事仁宗紀失書

六年閏八月歐陽脩自禮部侍郎樞密副使除參知政事 此事仁宗紀失書

治平元年十二月王疇自翰林學士禮部侍郎除樞密副使 此事英宗紀失書

樞密副使吳奎丁父憂 奎以父憂去位明年詔起復固辭而英宗紀不書罷亦脫漏也

二年二月樞密副使王疇卒 此事英宗紀失書
五月陳旭自資政殿學士禮部侍郎除樞密副使 此

事英宗紀失書

七月呂公弼自工部侍郎權三司使樞密直學士除樞密副使 此事英宗紀失書

三年四月胡宿自樞密副使以觀文殿學士吏部侍郎知杭州郭逵自殿前都虞候容州觀察使加檢校太保除同簽書樞密院事十月郭逵自同簽書樞密院事除陝西四路沿邊宣撫使兼判渭州 此三事英宗紀失書

四年九月韓絳自三司使吏部侍郎邵亢自樞密直學士兵部員外郎知開封府並除樞密副使 神宗紀

止載邵亢一人紀之漏也

郭逵自同簽書樞密院事以宣徽南院使判鄆州 此事神宗紀失書

熙寧元年十二月邵亢自樞密副使以資政殿學士給事中知越州 此事神宗紀失書

七年十二月王韶自觀文殿學士兼端明殿學士龍圖閣學士禮部侍郎知熙州除樞密副使 此事神宗紀失書其十年二月書以王韶知洪州亦無罷字

元豐元年閏正月簽書樞密院事曾孝寬丁父憂 孝寬公亮之子也神宗紀書公亮歿而不書孝寬之去

位亦闕漏

宰輔表三

元祐元年閏二月安燾自同知樞密院事進知樞密院事 此事哲宗紀不書攷宰輔編年錄稱燾自同知遷知院命既下而給事中王巖叟封還之侍御史劉摯右諫議大夫孫覺左司諫蘇轍亦言之俱不聽命再下而給舍又封還三月詔安燾堅辭知樞密院事特依所乞依舊同知樞密院事仍令班左丞李清臣上是燾之除命既下而中止故次年六月又有知院之除也表失書仍舊任一節

三年四月壬午 是日劉摯自中大夫尚書左丞除中書侍郎與孫固竝命表失書

四年六月丙午 是日許將自翰林學士除中大夫尚書右丞表失載

元符二年閏九月黃履自通議大夫尚書右丞以守本官知亳州 此事哲宗紀失書

建中靖國元年十一月庚申 編年錄作丙子 崇寧元年六月丙申 據徽宗紀及編年錄陸佃之罷

在五月己卯許將四人之除官在五月庚辰與表異 三年十二月同知樞密院事安惇卒 此事徽宗紀失

書

五年二月趙廷之自尚書右僕射兼中書侍郎加特進

光祿大夫尚書右僕射兼中書侍郎 按挺之於去

年六月罷相為觀文殿大學士中太乙宮使此當云

自觀文殿大學士中太乙宮使不當仍舉前官也

政和六年八月乙巳

編年錄作巳巳

薛昂自銀青光祿大夫尚

書右丞除尚書左丞侯蒙自中大夫尚書左丞除中

書侍郎 徽宗紀以為十一月戊申事

十一月童貫自節度使開府儀同三司陝西河東河北

宣撫使除簽書樞密院事 徽宗紀不載此事編年

錄載於是年二月

靖康元年正月甲戌耿南仲自簽書樞密院事進同知

樞密院事 欽宗紀編年錄俱不載此事

宰輔表四

建炎三年二月己巳葉夢得自試戶部尚書遷中大夫

除尚書左丞 按宰輔編年錄夢得執政纔十四日

自巳巳至辛巳祇十三日

至三月辛巳罷授資政殿學士提舉中

太乙宮兼侍讀表祇書除而不書罷亦踈漏也

三月庚辰朱勝非自守中書侍郎除通奉大夫守右僕

射兼中書侍郎兼御營使故事命相進官三等勝非

特進五官 按勝非任中書侍郎日官已至太中大
夫矣由太中而上則有通議通奉正議正奉宣奉五
等此云進五官當是宣奉大夫非通奉也

辛巳盧益自中大夫同知樞密院事除尚書左丞 按
高宗紀益未拜復罷為資政殿學士編年錄亦云戊
子召王孝迪盧益並奉使金國益辭行遂以本職提
舉崇福宮執政凡八日表亦祇書除而不書罷蓋史
之疎漏多矣

四年二月乙未杜充罷右相以觀文殿大學士提舉江
州太平觀 充於去年十一月降金至是乃有罷相
奉詔之命所謂文而不實也

六月丙戌前宰相呂頤浩朱勝非罷為江東西兩浙安
撫大使 前宰執除官表例不書且其時頤浩為江
東安撫勝非為江西安撫若兩浙路安撫則劉安世
為之安世非前宰相也兩浙二字當刪又不當有罷
字紹興元年汪伯彥除江東安撫大使二年李綱除
湖廣宣撫使九年張浚復資政殿學士知福州三十
一年張浚復觀文殿大學士判建康府與此同
紹興三年十月癸丑朱勝非以右僕射起復 勝非起
復本紀在七月乙亥編年錄在七月癸酉

秦檜 按檜以二年八月罷相至八年三月復自樞密使入相表於三年四年五年六年七年第一格俱有秦檜字誤也湯思退於紹興三十年十二月罷相而表於三十一年猶書湯思退誤與此同柯氏宋史新編皆刪去

六年十二月張守自資政殿學士提舉洞霄宮除參知政事 按自是年至紹興三十二年執政除罷皆失書寄祿之官至孝宗卽位史浩張燾輩乃復書寄祿官隆興末錢端禮虞允文王剛中初除簽樞亦失書官自後或書或否至淳熙七年周必大以後執政書官者十不得一矣

八年十二月甲戌 此條當移於己未之後

十一年十月癸巳韓世忠罷樞密使云云 當在第四格誤列於第三格

十五年十月秦熈自翰林學士承旨除知樞密院事 按高宗紀不載此節但書以翰林學士承旨秦熈為資政殿學士提舉萬壽觀兼侍讀恩數視執政班簽書樞密之下而已攷之編年錄熈除知院力請依李淑故事避親而罷乃有資政學士之命表書除而不書罷蓋失之矣至十八年三月壬午再以熈知樞密院事四月熈乞避父子共政以為觀文殿學士提舉

萬壽觀兼侍讀提舉祕書省恩禮視宰臣班次亞右僕射表却失書

十八年正月乙未段拂罷參知政事 紀在二月按是歲正月庚申朔無乙未日

七月丙申 紀在八月 第三格 西同

二十六年八月 是月辛卯程克俊罷參政以資政殿學士提舉洞霄宮表失書

二十九年正月丁亥 當作七月 柯氏新編 作七月

九月甲午陳康伯右僕射 當云陳康伯自參知政事兼權樞密院事除右僕射同中書門下平章事

三十一年六月庚申周麟之罷同知樞密院事 高宗

紀失書

十月張浚復觀文殿大學士判建康府 據高宗紀是月甲子復張浚觀文殿大學士判潭州十一月壬申以浚判建康府表誤并為一事

隆興元年五月癸亥 孝宗紀作六月

乾道元年二月戊申陳康伯罷左僕射授少師觀文殿大學士魯國公致仕 按孝宗紀二月丁未陳康伯薨在罷相前一日編年錄康伯既薨鎖院降麻以少師觀文殿大學士致仕洪氏容齋隨筆言宣和以前

未有既歿而方乞致仕者南渡之後故實散亡於是朝奉武翼郎以上不以內外高卑率爲此舉其最甚而無理者雖宰相輔臣考終於位其家發哀卽服降旨聲鍾給賻旣已閱日方且爲之告廷出命綸書之中不免有親醫藥介壽康之語如秦太師万俟卨相陳魯公沈必先王時亨鄭仲益是已

四月丙戌洪适自翰林學士左中奉大夫知制誥除端明殿學士簽書樞密院事 孝宗紀作六月丙戌許及之撰适行狀亦云六月此表誤也編年錄亦作四月表蓋承其誤三年十一月劉珙自翰林學士知制誥除同知樞密院

事 據朱熹撰墓記珙自朝散郎除中大夫

七年三月己丑張說自明州觀察使知閤門事兼樞密副都承旨除簽書樞密院事 己丑當作己卯據孝宗紀是月戊子說罷爲安慶軍節度使提舉萬壽觀至次年二月癸亥復除簽書樞密院事表於罷而復除兩事皆略而不書失其實矣

淳熙九年 是年九月庚午王淮自右丞相兼樞密使福國公加特進左丞相封冀國公梁克家自觀文殿學士禮泉觀使兼侍讀遷金紫光祿大夫右丞相封儀國公表旣失書又自是年至十三年第一格俱當

有梁克家字亦並失之而於十三年第二格內却有
梁克家罷右丞相一節則是表本有而刊本脫去之
耳蓋此表第四卷多闕文如高宗建炎三年七月鄭
穀卒八月劉珏權同知三省樞密院事十一月周望
同知樞密院事四年正月滕康劉珏罷紹興三年二
月權邦彥卒六年二月沈與求罷七年六月沈與求
卒孝宗乾道七年七月王炎除樞密使淳熙十五年
正月施師點罷黃洽知樞密院事蕭燧參知政事光
宗紹熙元年十二月王藺罷五年九月羅點卒寧宗
慶元四年七月葉翥罷六年六月許及之以母憂去

位嘉泰二年十一月陳自強知樞密院事許及之參
知政事嘉定元年六月林大中卒八月邱密卒六年
正月宇文紹節卒三月樓鑰罷七年正月章良能卒
八年二月雷孝友罷十二年四月曾從龍罷十四年
十二月鄭昭先罷皆本紀所書而表無之然柯氏新
編表中一一具書知柯所見本尚未脫落監本屢經
修補寔失其舊非盡史臣之失也

紹熙五年八月留正罷左相 當云以觀文殿大學士
判建康府方合前後之例

嘉泰三年正月傅伯壽自翰林學士除端明殿學士簽

書樞密院事 寧宗紀云伯壽辭不拜

宰輔表五

寶慶元年四月薛極端明殿學士正議大夫簽書樞密院事 按極於嘉定十五年已除簽書中間不聞罷免蓋因轉官正議大夫而書也此卷於宰執轉官皆書較之前卷加詳

紹定五年十月丙辰以火延太廟故薛極鄭清之喬行簡詔各降一官 按薛極等復官在五月則降官必在五月以前此云十月者刊本之譌

端平二年六月葛洪除資政殿大學士通議大夫提舉

臨安府洞霄宮 按理宗紀紹定四年六月洪已除

資政殿學士知紹興府矣此後未見復除執政之事

十二月魏了翁自同簽書樞密院事督視京湖軍馬除

簽書樞密院事力辭改資政殿學士湖南安撫使

去理宗紀了翁知潭州在次年四月知潭州例帶荆

湖南路安撫使其實一也

三年九月乙亥鄭性之兼同知樞密院事李鳴復兼參知政事 理宗紀失書

癸亥宣繪自資政殿大學士光祿大夫提舉臨安府洞霄宮除觀文殿大學士致仕 按宣繪傳嘉定十四

年同知樞密院事兼參知政事明年拜參知政事以
資政殿學士奉祠端平三年召赴闕升大學士提舉
洞霄宮以觀文殿大學士致仕繪之罷政奉祠當在
寶慶三年以後紀表俱失書此年被召進官致仕則
又例所不應書也

嘉熙二年正月戊申余天錫自少中大夫試吏部尚書
除端明殿學士同簽書樞密院事 理宗紀失書
七月庚辰趙以夫自右文殿修撰樞密都承旨除沿海
制置副使兼知慶元府同知樞密院事 理宗紀不
書淳祐元年三月以夫罷紀亦不書

三年二月壬寅余天錫兼同知樞密院事 理宗紀失
書

十月庚申許應龍罷簽書樞密院事林略罷同簽書樞
密院事 理宗紀失書

四年九月癸亥喬行簡自少傅平章軍國重事特授少
師保寧軍節度使醴泉觀使奉祠 理宗紀失書行
簡罷政事

淳祐元年十二月資政殿大學士通議大夫知慶元府
余天錫乞守本官致仕 按天錫傳罷政授資政殿
學士知紹興府浙東安撫使此云知慶元府豈初除

紹興而改除慶元乎表失書其罷政之月日

二年二月游侶出帥浙東尋奉祠當云自知樞密院事兼參知政事除知紹興府浙東安撫使尋改提舉洞霄宮

十二月丙寅別之傑自同知樞密院事兼權參知政事除資政殿學士湖南安撫大使知潭州理宗紀失書

四年三月己未金淵除端明殿學士簽書樞密院事理宗紀失書

九月丙午史嵩之依前官起復加永國公按理宗紀

是歲十二月詔許右丞相史嵩之終喪則起復之詔

雖下仍不果行也表既失書詔終喪一節而於五年

六年第一格俱有史嵩之字則誤以為嵩之真起復

矣柯氏新編於五年六年無嵩之名

五年正月乙卯劉伯正罷參知政事十二月癸未李性

傳除職予郡理宗紀失書

六年十二月乙未右丞相史嵩之守本官致仕是月

嵩之服除詔依前守金紫光祿大夫觀文殿大學士

永國公當云前右丞相乃與見任有別

七年三月戊辰李韶依舊端明殿學士提舉萬壽宮兼

侍讀 韶非執政不當列於表

九年閏二月吳淵以端明殿學士沿江制置使江東安撫使兼知建康府兼行宮留守 淵非執政以次年詔與執政恩數故預書之非例也

十年三月賈似道除端明殿學士兩淮制置大使淮東安撫使知揚州 是時似道未爲執政例不當書

寶祐二年五月李曾伯除參知政事帥蜀郡 按曾伯傳但云進資政殿學士制置四川邊面與執政恩例不云除參政也理宗紀亦不書除參政疑表誤

景定元年正月乙丑林存以資政殿學士知建寧府

已見上年十一月此重出

景定元年九月厲文翁依舊端明殿學士提舉臨安府洞霄宮 文翁非執政不當列于表

三年九月辛未資政殿學士沈炎薨 表於執政例書卒此書薨誤也

四年六月丁巳馬光祖依舊觀文殿學士提舉臨安府洞霄宮 據理宗紀乃上年十一月癸巳事疑表誤
五年八月乙丑姚希得除參知政事十一月乙未葉夢鼎自同知樞密院事除參知政事姚希得自簽書進同知樞密院事兼參知政事 本紀俱失書

咸淳元年二月丁未姚希得自同知樞密院事除參知政事江萬里自簽書樞密院事進同知樞密院事度宗紀俱失書攷江萬里傳萬里自同簽書去官後知建寧府改知福州度宗卽位召同知樞密院事此云自簽書進同知院事亦誤也

壬申王爚依舊端明殿學士除簽書樞密院事 度宗紀失書

十一月辛丑留夢炎自權禮部尚書除端明殿學士簽書樞密院事 度宗紀失書

八年三月丙子趙順孫自同知樞密院事兼參知政事

授中大夫 按順孫於六年正月除同簽書樞密院事其遷同知院未詳何時

德祐元年三月乙亥王爚自觀文殿學士除左丞相兼樞密使 按爚於上年十一月已除左丞相矣攷瀛國公紀是歲二月似道上書請遷都下公卿雜議爚言已不能與大計遂去己已召爚爲浙西江東宣撫招撫大使使居京師以備咨訪蓋罷相於二月而再相於三月也表失去中罷一節

二月丁未姚希得除參知政事 按希得傳咸淳五年卒安得德祐初尚存此必誤也瀛國公紀亦無此事

二年正月庚午黃鏞自同簽書除參知政事 按瀛國公紀是日同簽書樞密院事黃鏞參知政事陳文龍遁謂鏞與文龍同遁也表殆誤

已卯全允堅加太尉除參知政事 按瀛國公紀是日

加全永堅太尉 即允堅也允永聲相近 參知政事常楙遁本各

是一事參知政事四字屬下句永堅以后族加太尉不為參政也表又誤

宋史八終

宋史九

廿二史攷異七十五

錢大昕學

后妃傳

真宗章懷潘皇后忠武軍節度使美第八女 按潘美

傳美子惟熙娶秦王女平州刺史惟熙女即章懷皇

后也二傳或以為美女或以為孫女必有一誤

章獻明肅劉皇后 蜀人龔美者以鍛銀為業攜之入

京師后為美人以其無宗族乃更以美為兄弟改姓

劉 按長編劉氏始嫁蜀人龔美攜以入京既而家

貧欲更嫁之張旻時給事襄王宮言于王得召入遂

有寵美因改姓劉爲美人兄云此傳不言嫁美者史家諱之外戚劉美傳直以美爲劉通之子畧不及改姓事更失其實矣

仁宗郭皇后 初帝寵張美人欲以爲后章獻太后難之 按長編云驍衛上將軍張美曾孫女與郭后同入宮上屬意之將選爲后卽此傳之張美人也旣立郭后以張爲才人天聖六年進美人尋卒明道二年追冊張爲皇后蓋仁宗朝內職追冊后者二人皆張姓史但爲溫成立傳而不及明道追冊之后亦疏漏矣

尙氏與楊美人俱幸數與后忿爭一日尙氏於上前有侵后語后不勝忿批其頰上自起救之誤批上頸上大怒入內都知閻文應因與上謀廢后且勸上以爪痕示執政上以示呂夷簡且告之故夷簡亦以前罷相怨后乃曰古亦有之后遂廢 此事又見宦者傳慈聖光獻曹皇后樞密使周武惠王彬之孫也 按曹彬傳追封濟陽郡王累贈韓王不云周王蓋傳逸其文

張貴妃 父堯封堯封妻錢氏 按長編堯封天聖初客南都依大姓曹氏曹以女妻之後擢進士第補石

列異 二
州軍事推官未行卒京師從兄堯佐將赴官于蜀曹氏請以諸孤從行堯佐以道遠弗許堯封母錢氏女也張氏時八歲與姊妹三人由錢氏入宮寢是錢氏乃堯封母非堯封妻傳誤以爲一人

皇祐初進貴妃後五年薨

按仁宗紀慶歷八年

戊子十

二月丁卯冊美人張氏爲貴妃其明年改元皇祐此云皇祐初進貴妃者誤也紀載至和元年甲午正月癸酉貴妃張氏薨自戊子至甲午凡七年不得云後五年

哲宗昭慈聖獻孟皇后

太后生辰置酒宮中從容謂

帝曰宣仁太后之賢古今母后未有其比昔奸臣恣爲誣謗雖嘗下詔明辨而國史尙未刪定豈足傳信吾意在天之靈不無望于帝也帝聞之悚然後乃更修神宗哲宗實錄 此事又見范冲傳而彼文較詳又句濤傳稱重修哲宗實錄帝諭之曰昭慈聖獻皇后病革朕流涕問所欲言后愴然謂朕曰吾逮事宣仁聖烈皇后見其任賢使能約己便民憂勤宗社疏遠外家古今母后無與爲比不幸姦邪罔上史官蔡卞等同惡相濟造謗史以損聖德誰不切齒在天之靈亦或介介其以筆屬正臣亟從刪削以信來世朕

念遺訓未嘗一日輒忘今以命卿詞意亦與此同
惟以爲臨沒之訓小有異爾以史例言之此事當入
后妃傳詳此而刪彼庶幾簡而有要

徽宗顯恭王皇后 大觀二年崩謚曰靜和紹興中始
祔徽宗廟室改上今謚云 按徽宗紀大觀四年十
二月改謚靖和皇后爲惠恭禮志亦有之獨本傳失
書又譌靖爲靜

寧宗恭聖仁烈楊皇后 楊次山官至少保封永陽郡
王次山二子谷封新安郡王石永寧郡王自有傳
按外戚傳次山由永陽郡王進會稽郡王官自少保

進少傅加太師非終於少保永陽郡王也谷官太傅
永寧郡王石由少保永寧郡王進封魏郡王較之此
傳爲詳備此但當云次山自有傳餘文皆可省也

度宗全皇后理宗母慈憲夫人姪孫女也 按劉克莊
集有全安民贈太保唐國公全份贈太傅豫國公全
大節贈太師徐國公制大節者慈憲夫人之父余天
錫傳所稱全保長也全祖望據其家乘云份五子長
思聰次大中次大節次大聲次大用大中無嗣以再
從子昭孫爲後卽全后之父然則后爲慈憲之姪女
非姪孫女矣度宗時追贈大中太師申王昭孫太師

列傳
四
和王宋史外戚傳不立昭孫傳蓋宋末事迹缺佚史臣失於采訪也

弟清夫庭輝等一十五人各轉一官按劉克莊撰全清夫制詞云屬以儲闈正人倫之始選諸戚畹得邦媛之賢如卿行尊蓋主婚禮是清夫於后爲尊行史云后弟誤

魏王廷美傳

廷美母陳國夫人耿氏朕乳母也後出嫁趙氏按杜太后傳生邕王光濟太祖太宗秦王廷美夔王光贊則廷美與太宗同母此云乳母耿氏所生者蓋廷美得罪之後造爲此言

燕王德昭傳

惟吉生甫彌月太祖命輦至內廷擇二女媼養視之按長編惟吉初名德雍太祖愛之視如己子故與諸叔聯名及出閣始改名此傳所失書也秦王廷美第四子亦名德雍似不應與惟吉先名同或長編傳寫有譌字

紹興元年詔曰太祖皇帝勩業垂統德被萬世神祖詔封子孫一人爲安定郡王世世勿絕今其封不舉朕甚憫之有司其上今封人名遵故事施行此詔又

見高宗紀

元祐六年簽書潁州公事 是時蘇軾知潁州趙令時
為簽判其銜當云簽書潁州節度判官廳公事史刪
去節度判官四字竟似簽書州事矣史家不通官制
涉筆便誤一至於此

初懿王生昌州團練使惟固惟固生楚安僖王從信從
信生益公世逢世逢生令憲 今按從信乃惟忠之
子惟忠嘗為昌州團練使非惟固也從信贈楚國公
此稱楚王一篇之中自相抵牾宗室世系表亦稱楚國公又以世
系表攷之令憲乃北海侯世爽之子從信子無名世

逢者未知孰是

令憲表作令憲
刊本之譌

建炎二年分西外宗子於秦州 朱子語類徽宗以宗
室衆多京師不能容故令秦王位下子孫出居西京
謂之西外太祖位下子孫出居南京謂之南外

秀王子偁傳

時孝宗為普安郡王疑所服詔侍從臺諫議秦熈等請
解官如南班故事 按徽宗分宗室出居西京南京
惟太宗以下子孫留京師其中又分兩等惟濮園之
後恩禮尤優所謂南班宗室也

漢王元佐傳

諮議趙齊王適翊善戴元頓首請罪 王適姚坦傳作

王適

神宗封王後以允言子宗說恭憲王長孫嗣封祁國公

神宗當作仁宗

昭成太子元億傳

宗保累官代州防禦使襲封燕國公 慶歷四年封建

安郡公傳失書

越王元傑傳

嘗作假山既成置酒召僚屬觀之翊善姚坦獨頓首不
視元傑強之坦曰坦見血山安得假山言州縣鞭撻

微民以取租稅假山實租稅所爲耳語見姚坦傳中

坦傳與此畧同當去此存彼

宗望終右武衛大將軍舒州防禦使 慶歷四年封清

源郡公傳失書

楚王元偁傳

允則無子以平陽懿恭王之子宗達爲後 慶歷四年

封宗達恩平郡公傳失書

徽宗諸子傳

次陳國公機 按世系表機贈太師兼右弼陳王謚悼

惠傳失書

公主傳

仁宗十三女徐國鄧國鎮國楚國商國魯國唐國陳國
豫國九公主皆早亡 按長編仁宗第三女安壽公
主生三歲而封薨追封唐國公主第四女寶和公主
二歲而封薨追封越國公主皆張修媛所生也傳有
唐國無越國叙次亦不合

王溥傳

謚文獻 按王洙傳夏竦卒賜謚文獻洙當草制封還
其目曰臣下不當與僖祖同謚因言前有司謚王溥
為文獻章得象為文憲皆當改於是溥得象皆易謚

又張揆傳仁宗詔改王溥謚有欲議為文忠者揆曰
溥周之宰相國亡不能死安得為忠乃謚為文康此
傳失書改謚事

石守信傳

追封威武郡王謚武烈 守信追封衛王累封秦王見
楊億撰石保興碑

保興本名保正 按保興碑云公初名貞太祖改錫今
諱此云保正者史家避仁宗嫌名改之

與戴興楊守一並為澶州前軍駐泊李繼遷入鈔徙銀
夏綏府都巡檢使 据碑保興由銀夏綏麟府州都

巡檢丁內艱起復澶州駐泊都監傳書除澶州駐泊於巡檢夏綏之前又失書母喪起復事

淳化五年真拜蘄州防禦使為永興軍鈐轄收夏綏麟

府州鈐轄至道二年徙延州都巡檢使 據碑保興

自京兆府即永興軍兵馬鈐轄徙延州路鈐轄無再任夏

綏事

未幾卒年二十八 保興封西安郡公追贈貝州觀察

使傳皆失書

高懷德傳

行周歷延潞二鎮及留守洛都節制宋毫皆署以牙職

晉開運初遼人侵邊以行周為北面前軍都部署懷

德始冠白行周願從北征以功領羅州刺史及行周

移鎮鄆州仍領牙校從行周再鎮宋州晉末契丹南

侵以行周為邢趙路都部署禦之留懷德守睢陽會

杜重威降契丹京東諸州羣盜大起懷德堅壁清野

敵不能入行周率兵歸鎮敵遂解去漢初行周移鎮

魏博及再領天平以懷德為忠州刺史領職如故

按五代史高行周傳唐明宗時遷振武軍節度使歷

鎮彰武即延州昭義即潞州晉高祖時為西京留守徙鎮

天雄安從進叛以行周為襄州行營都部署討平之

徙鎮歸德州卽宋出帝時代景延廣爲侍衛親軍都指

揮使是時李彥韜馮玉等用事乃求歸鎮漢高祖入

京師加守中書令徙鎮天平其叙行周歷官與此傳

互異今以通鑑及兩史參攷之則各有疏漏歐史晉

本紀開運元年正月契丹陷貝州歸德軍節度使高

行周爲北面行營都部署此卽懷德傳所載遼人侵

邊行周爲都部署事而行周傳不書殆以其無功畧

之歟懷德以宋太平興國七年壬午歲卒年五十七

上溯開運元年甲辰蓋年十九故云始冠也舊五代

史本紀開運元年四月高行周爲侍衛親軍都指揮

使二年四月移鎮鄆州侍衛如故三年六月行周爲

宋州節度使加兼中書令充北面行營副都統蓋行

周本以歸德帥領侍衛親軍及移鎮鄆州亦不之任

至三年六月再鎮宋州乃不典軍職歐史謂李彥韜

等用事求歸鎮者當在其時惟歐史失書移鎮鄆州

一節不如懷德傳之詳備耳宋史符彥卿傳杜重威

以大軍降急詔彥卿與高行周領禁兵屯澶淵會張

彥澤引遼兵入汴彥卿與行周遂歸遼此卽懷德傳

所云行周爲邢趙路都部署事也行周傳旣失書領

禁兵北征事其降於契丹則兩傳皆諱而不言彥卿

傳又云會徐宋寇盜蜂起遂主即遣彥卿歸鎮是時
彥卿爲徐帥得遣歸鎮則行周之歸宋州亦契丹所
遣也漢本紀天福十二年杜重威反天平節度使高
行周爲鄴都行營都部署以討之攷薛史本紀是年
八月以杜重威爲宋州節度使以高行周爲鄴都留
守本是互相更換及重威拒命行周討平之因留鎮
天雄至乾祐三年三月乃自天雄再徙天平耳歐史
本紀既誤而傳尤脫漏不如此傳之核

慕容延釗傳

加殿前都點檢同中書門下三品 三品當作二品

郭從義傳

父紹古事後唐武皇 按東都事畧從義父古無紹字
卒年六十三 東都事畧作六十四

楊承信傳

楊承信 通鑑作楊信蓋避漢隱帝諱去上一字也同
時又有瀛州楊信自有傳而楊業之父亦名信

馮繼業傳

加靈州大都督府長史遷朔方節度靈環觀察處置度
支溫池榷稅等使 當云遷朔方節度使餘文皆可
省

三年改鎮定國軍 按同州龍興寺有開寶八年碑文
稱府主連帥太師又云門下平章之命 殿宣麻則
繼業鎮同州日嘗加檢校太師同中書門下平章事
而傳失書

張從恩傳

父存信振武軍節度後唐明宗微時嘗隸存信麾下

五代史義兒傳李存信本姓張氏當是從恩之父也
歐史不云爲振武節度

趙贊傳

晉祖起并門 并門當云太原

晉祖命贊奉母歸薊門 薊門當云幽州傳益采碑志
之文未及刊改

張承德傳

年七十三 東都事畧作七十二

吳廷祚傳

加同中書門下三品 三品當作二品

李崇矩傳

遵勗初尚主詔升爲崇矩子授昭德軍留後駙馬都尉
遵勗官不止留後當云見外戚傳

李處耘傳

文選

宋史九

三

贈宣德軍節度使 按五代會要周顯德二年升湖州
為宣德軍節度使

子繼隆繼和自有傳 凡父子祖孫各傳分在它卷者
例書自有傳此繼隆繼和二人即附處耘之後非別
有傳當時史臣豈未攷前史之例耶

昭慶改名昭亮至東上閣門使高州刺史 昭亮更名
避章獻太后祖諱也昭亮官至節度使不止刺史當
云見外戚傳

郭守文傳

并州太原人 守文字國華見東都事畧

崇仁為解州團練使 崇仁官亦不止團練當云見外
戚傳

劉廷讓傳

劉廷讓字光父 按太祖紀乾德二年十一月江寧軍

當作寧 節度使劉光義為西川行營前軍兵馬都部

署當作副都部將步騎二萬出歸州道以伐蜀光義

即廷讓也長編亦光義必廷讓之名後來避太宗諱

改以字行耳其書義字或為父或為毅曹彬曹翰劉

毅皆避諱所改

領江寧軍節度 江寧當作寧江其時江南稱臣未入

版圖不當遥授節鎮也

李懷忠傳

累遷殿前都指揮使都虞候 按殿前都指揮使乃武臣之最貴者懷忠名位尚微不得除授蓋都指揮使麾下別置都虞候并非殿前都虞候也

陳承昭傳

江表人 江表非郡縣之名史家失攷其本貫亦當云江南人方合史例李之才青社人高文虎四明人李曾伯覃懷人青社四明覃懷皆非縣名

李濤傳

晉祖幸大梁張從賞以孟津叛 從賞當作從賓

劉載傳

建隆四年貝州節度使張光翰來朝 按光翰傳不載鎮貝州事

張昭傳

詔正國節度盧質 本匡國軍避太祖諱追改及梁郢王均帝 均帝當作均王或稱末帝 竇儀傳

乾德二年范質等三相並罷越三日始命趙普平章事制書既下太祖問翰林學士曰質等皆罷普敕何官

當署承旨陶穀時任尙書乃建議相位不可以久虛
今尙書乃南省六官之長可以署敕儀曰穀所陳非
承平之制皇弟開封尹同平章事卽宰相之任太祖
曰儀言是也卽命太宗署敕賜之 此事又見職官
志及趙普傳穀引唐大和中文露事數日無宰相左
僕射令狐楚等奉行制書故儀以爲非承平之制今
刪去穀引甘露事則儀語爲無著矣

宋史九

宋史十

廿二史攷異七十二

錢大昕學

李昉傳

預宴大明殿上見昉坐盧多遜下因問宰相對曰多遜

學士昉直殿爾

當作直院

卽令真拜學士令居多遜上

按學士無品秩而以官寄祿昉時官中書舍人而多
遜爲兵部郎中班居舍人之下及預宴列坐乃在昉
上蓋詞臣班序直院例居學士之下初不論寄祿官
之高卑也

昉坐左遷太常少卿俄判國子監 按太常少卿正四

文異

宋史十

品自舍人而除乃稱左遷者學士職居清要號稱內相罷內直而任卿監官品雖升猶爲左遷也

李宗諤傳

恥以父任得官獨由鄉舉第進士 按洪容齋引國史許仲宣傳云仲宣子好問雍熙二年舉進士與李宗諤呂蒙亨王扶竝預廷試宗諤卽宰相昉之子蒙亨參知政事蒙正之弟扶鹽鐵使明之子上曰斯竝勢家與孤寒競進縱以藝升人亦謂朕有私也皆下第

見容齋四筆

宋史呂蒙正傳亦云蒙亨舉進士高等旣廷試以蒙正居中書故報罷而宗諤傳云第進士王明

傳云子挺扶並進士及第許仲宣傳云子待問再舉及第然則終於不第者惟蒙亨一人耳

先是後苑陪宴校理官不與京官乘馬不得入禁門至是皆因宗諤之請復之 按淳化初宴近臣後苑三館學士皆預閣門東第令直館赴會宗諤以校理不得預宴獻詩有無聊獨出金門去恰似當年下第歸之句乃詔自今游宴宣召直館其集賢秘閣校理並令預會卽其事也其請京官乘馬入禁門亦指京官任館職者非凡爲京官者皆得援此例也宗諤時官秘書郎正是京官故有是請又按麟臺故事至道元

年十月三館學士各獻歌頌以李宗諤趙安仁楊億
詞理精當有老成之風召至中書獎諭明日以秘書
丞李宗諤爲太常博士依前直昭文館此事本傳失
書

呂蒙正傳

自是宰相子止授九品京官遂爲定制 按聞見錄云
大理評事爲狀元及第宰相任子之初官評事正九
品京官也

咸平四年以本官同平章事昭文館大學士 宋初循
舊制昭文館集賢院大學士及監修國史皆以宰相
領之若三相則首相領昭文其次領國史其次領集
賢宋人集中稱昭文相公集賢相公史館相公者是
也列傳或書或不書於例初不畫一

張齊賢傳

擢右諫議大夫簽書樞密院事 齊賢以太平興國二
年登科六年爲轉運使八年召還遂由密學除執政
宋初用人之速未有如齊賢者

張子憲傳

遷右諫議大夫知桂州不赴御史劾之降秘書監復爲
光祿卿加直祕閣知廬州遷祕書監 按麟臺故事

嘉祐三年以光祿卿張子憲趙良規掌禹錫齊廓張子思竝直祕閣先是張子憲等皆爲太常少卿直祕閣當遷諫議大夫而中書以爲諫議大夫不可多除故竝遷正卿而故事大卿監無帶館職者故特爲請而還之今據本傳則子憲已遷諫議因御史劾而左遷且亦未嘗先直祕閣與程俱所記殊不合且旣云降祕書監矣而又云遷祕書監亦必有譌脫也

賈黃中傳

與宋白呂蒙正等同知貢舉 蒙正傳失書知舉事
錢若水傳

贈戶部尙書 按列傳失載諸臣之謚如錢若水謚宣靖呂餘慶謚文穆辛仲甫謚康節李穆謚文恭崔翰謚武毅楚昭輔字景襄楊億謚文楊徽之謚文莊孫沔謚威敏高永年謚忠愍王溥改謚文康田況謚宣簡李東之謚懿靖任福謚莊愍姚麟謚忠愍王中正謚恭僖張茂則謚僖儉李繼勳謚莊武郭逵謚忠穆蒲宗孟謚恭敏王存謚莊定鄭俠謚介呂惠卿謚文敏韓忠彥謚文定韓粹彥謚文惠胡宗愈謚修簡溫益謚定簡龔夬謚節肅李邦彥謚文和管師仁謚文懿耿傅謚忠憲王雲謚忠介姚麟謚忠愍張闡謚忠

簡鄭穀謚忠穆胡世將謚忠獻韓彥直謚莊敏張俊
謚忠烈王德謚威定王忠植謚義節辛次膺謚簡穆
吳芾謚康肅范成大謚文穆呂祖儉謚忠徐榮叟謚
文靖趙汝談謚文懿至若李綱劉安世謚忠定吳璘
謚武順張栻謚宣洪咨夔謚忠文吳淵謚莊敏游似
謚清獻趙與憲謚忠憲趙與騰謚忠清岳飛改謚忠
武秦檜改謚繆很則帝紀具載而本傳轉不書

溫仲舒傳

三年判昭文館大學士命下卒 按昭文館集賢院大
學士惟見任宰相兼之仲舒雖前執政未應遽有大

稱當是除學士判館事耳東都事畧長編俱不載此
事

柴禹錫傳

景德初子宗慶選尚召禹錫歸闕令公主就第謁見行
舅姑禮固辭不許 按外戚傳宗慶祖禹錫鎮寧軍
節度父宗亮太子中舍宗慶尚太宗女魯國長公主
升其行爲禹錫子公主傳亦云宗慶禹錫之孫帝命
主以婦禮謁禹錫第則宗慶實宗亮之子此傳所書
失其實矣宋制尙公主者皆升與父同行如王貽永
本貽正之子升爲溥子李遵勗本繼昌之子升爲崇

矩子本傳皆著其實獨此篇乃自亂其例也

宗慶永清軍節度 宗慶終於成德軍節度且加平章

事當云見外戚傳

王著傳

有傳見五代史 按著卒於宋初不當入五代史歐陽

史亦無著傳恐誤

王祐傳

繼以用兵獄表徙知襄州湖湘平移知潭州 按太祖

平湖湘在乾德元年此傳上文言太祖親征太原則

在開寶二年符彥卿離人名亦在開寶二年是時湖

湘之平已久矣祐知襄州必在用兵嶺南之時而史

誤以為湖南耳

馬令琮傳

父全節歷橫海定遠昭義彰德定武天雄六節度 定

遠當作安遠字之譌也定武本是義武史家避太宗

諱追改

何繼筠傳

父福進歷事後唐至周累官忠武成德天平三節度

春明退朝錄何中令福進謚莊烈在宋朝使相之列

據此傳福進實卒於周代蓋宋初追謚也安審琦亦

卒於五代而宋初追謚恭惠

李漢超傳

守恩子祐之順之用之潤之慶之成之藏之 按祐之昆弟官位事蹟皆不著而一一具列其名似誌狀之文非史法矣王繼忠子懷節懷敏懷德懷政蘇轍三子遲适遠蘇過七子籥籍節笈篋箛箭汪藻子六人恬恪恂愴懍懍洪适子九人槻秘摺樞桴楹棨劉光祖子端之靖之翊之竑之張俊子五人子琦子厚子顏子正子仁衛膚敏子仲英仲傑仲循句龍如淵子佃僕似此類皆可省

郭進傳

少貧賤爲鉅鹿富家傭保嗜酒蒲博其家少年患之欲圖殺進婦竺氏陰知其謀以告進遂走晉陽 按東都事略進少依鉅鹿富人家傭作人有欲殺之者富人婦竺氏陰告之乃至晉陽太平興國初判邢州訪竺氏婦已死家甚貧得其女撫養如己子厚其資裝以嫁之史但云婦竺氏而不云富人婦似竺氏爲進之婦矣

太平興國初又賜宅一區 上文已云太平興國初賜京城道德坊第一區此重出也

安守忠傳

贈太尉 按宋時武臣有兩安守忠長編載元豐七年九月戶部尙書王存言準詔具析安守忠預繪像因依勘會所采臣僚勲績並于國史實錄攷求事迹據本傳所載贈太尉安守忠有戰功故迹當預繪像其捧日左廂都指揮使欽州團練使安守忠史冊無載卽無預繪像人數詔景靈宮改繪贈太尉安守忠像併推恩其家先是景靈宮繪像管勾官誤以欽州團練使安守忠充數而贈太尉安守忠之孫自言故命存攷定而降是詔

王昭遠傳

謚惠和 春明退朝錄作和惠

張鑑傳

建議割瑞州清江 瑞州當作筠州南渡後避理宗嫌名改筠爲瑞此時無瑞州之名也

馬全義傳

幽州薊人 按王安石撰知節神道碑云馬氏故扶風人至公高祖徙處雲中雲中爲契丹所得故馬氏又徙處浚儀今開封府祥符也傳云幽州人與碑不合馬知節傳

諡正惠 按諡法無正字宋初馬知節呂端諡正惠高
休融諡正懿李昉王旦諡文正本皆貞字史臣避仁
宗嫌名追改之其後范仲淹司馬光蔡卞之文正吳
育之正肅呂公著之正獻呂大防之正愍亦以正代
貞非有二義元明以後正貞始兼用或謂正美於貞
蓋未攷其緣起耳

王繼忠傳

遂陷於契丹 繼忠後事具見遼史其力戰被陷事已
見王超傳不當更爲立傳

王延範傳

謂休復告延範將謀不軌及諸不法事 延範誕妄取
禍不足立傳當附見徐休復傳

呂端傳

幽州安次人父琦晉兵部侍郎 端與餘慶爲昆弟籍
貫家世已見餘慶傳當云參知政事餘慶之弟乃合
史例王旦父祐自有傳而且傳又載先世三代官爵
及父祐行事司馬光父池自有傳而本傳又書陝州
夏縣人父池天章閣待制李壁父燾自有傳而本傳
又書眉之丹稜人父燾典國史皆當準此例刊正

李沆傳

吾老不及見此參政它日之憂也 按沆爲相時年止
五十餘未可云老且少于沆僅十歲與沆同年登科
其參知政事距沆入相之始不過一年有餘安得遽
以新進目之沆雖先且而卒狀人命修短不齊豈能
預卜攷呂氏家塾記李文靖居相位王公參預朝政
一日便殿論邊事退公歎曰何日邊候徹警使吾輩
得爲太平宰相文靖不答至中書獨召公語云自非
聖人外寧必有內憂譬人有病常在日前則知憂而
治之沆死子必爲相遽與契丹和親一朝疆場無事
不有盤游之樂必興土木之工矣又元城語錄云李
丞相每朝謁奏事畢必以四方水旱盜賊不孝惡逆
之事奏聞上爲之變色慘狀不悅同列以爲非丞相
曰人主一日豈可不知憂懼若不知憂懼則無所不
至矣史臣據此二事稍收竄增飾之遂有此失呂氏
記沆死子必爲相之語本無病也

李維傳

除柳州觀察使 柳當作相柳州非節鎮不得有觀察
也

向敏中傳

翰林學士李宗諤當對帝曰朕自卽位未嘗除僕射今

命敏中此殊命也 此事洪邁容齋隨筆嘗辨之

傳範娶南陽郡王惟吉女安福縣主爲密州觀察使謚
惠節傳亮子經定國軍留後謚康懿經女卽欽聖憲
肅皇后也 當云見外戚傳

王欽若傳

王曾對曰欽若與丁謂林特陳彭年劉承珪時謂之五
鬼 林特附見欽若傳以五鬼之目牽連及之也及
敘特事又云當時與陳彭年等號五鬼語見王欽若
傳一篇之中重複如此

丁謂傳

真宗崩議草遺制軍國事兼取皇太后處分謂乃增以
權字 按王曾傳曾入殿廬草遺詔以明肅皇后權
聽斷軍國大事丁謂入去權字曾曰皇帝冲年太后
臨朝斯已國家否運稱權猶足示後且增減制書有
法表則之地先欲亂之邪遂不敢去長編亦云丁謂
欲去權字以王曾言乃止與此傳正相反似當以曾
傳爲是狀遺制出自中書而謂爲首相終能聽用讜
論亦自足多故太后惡之

陳堯咨傳

子述古太子賓客致仕 按歐陽修撰堯佐神道碑以

述古爲堯佐子予見述古題名石刻稱孟父中令大人太尉相公季父太尉康肅公中令者堯叟也太尉相公者堯佐也太尉康肅公者堯咨也述古爲堯佐子史繫於堯咨傳誤矣中令太尉皆贈官吏於堯叟書贈侍中不云中書令於堯佐書贈司空不云太尉蓋後來加贈史家不能悉書也

宋祁傳

預修廣業記 業當作樂

景祐中詔求直言 按景祐紀年在慶歷之前上文書庠復知政事罷祁翰林學士改史館修撰修唐書皆慶歷中事不應更敘景祐恐是皇祐之譌下文封張貴妃云云正皇祐元年事也

宋湜傳

謚曰忠定 春明退朝錄謚恭質

王嗣宗傳

嗣宗嘗自言知武事可授廉車 廉車謂觀察使也卽拜耀州觀察使知永興軍府 宋時以觀察使爲武臣寄祿官嗣宗進士第一人出身官至侍郎秩四品換觀察使武資秩三品也石林燕語云國朝侍從官間有換武職者依唐袁滋故事例皆換觀察使如李

尚書維自承旨李左丞仕衡自三司使皆然天聖間
陳康肅堯咨以翰林學士知開封府亦換宿州觀察
使加檢校司徒知天雄軍陳力辭明肅后諭之曰天
雄朔方會府非文武兼才不可陳不得已受命自是
加留後遂建節石林博於典故然不知嗣宗換武資
更在李陳諸人之前也堯咨亦進士第一人正用嗣
宗故事

子堯臣內殿承制 與參政王堯臣同姓名且又同時
夏侯嶠傳

咸平元年以戶部郎中罷 郎中當作侍郎

張觀傳

字思正 宋史列傳有兩張觀兩王著兩黃震

宋史十一
宋

宋史十一

廿二史攷異七十七

錢大昕學

田錫傳

出知陳州坐稽留殺人獄責授海州團練副使 按容
齋四筆云陳州民張矩殺里中王裕家兩人知州田
錫未嘗慮問又詣闕訟冤遣二朝士鞠之皆云非矩
所殺裕家冤甚其子福應募為軍因得見曰臣非欲
隸軍蓋家冤求訴耳太宗怒付御史府治之寘矩於
法二朝士皆坐貶錫與通判郭渭謫為海郢州團練
副使史於錫傳既不詳書而刑法志亦不之及何也

列異

王禹偁傳

憲宗嘗命裴洎銓品庶官 洎當作埒

尹洙傳

年四十七 歐陽修撰墓志作四十六

謝絳傳

年四十六 歐陽修撰墓志作四十五

梁顥傳

年九十二 按陳正敏遜齋閒覽稱梁顥八十二歲狀

元及第卒年九十餘士大夫多以為口實洪文敏引

國史顥卒年四十二史臣云梁之秀顥中道而摧以

正遜齋之誤東都事略亦云年四十二與國史同李

心傳朝野雜記載狀元年三十以下者云梁內翰顥

年二十三顥登第在雍熙二年乙酉至景德元年甲

辰卒恰是四十二歲也傳作九十二未知何據即如

其言追溯及第之時止合七十三歲與遜齋說亦不

合

適相仁宗別有傳 按適為顥之子顥傳在第五十五

卷而適傳在第四十四卷先後亦為乖次

楊徽之傳

周顯德中舉進士劉温叟知貢部中甲科 据五代會

文是

宋史十一

二

要在顯德二年

時劉昌言拔自下位不踰時參掌機務懼無以厭人望常求自安之計童儼爲右計使欲傾昌言代之嘗謂徽之曰上遇張洎錢若水甚厚旦夕將大用有直史館錢熙者與昌言厚善詣徽之徽之語次及之熙遽以告昌言昌言以告洎洎方固寵謂徽之遣熙構飛語中傷已遂自上怒召昌言質其語出徽之爲山南東道行軍司馬熙落職通判朗州 此事又見張洎錢熙傳童儼當作董儼

杳道傳

享年六十四 新安志年六十二

許元傳

累遷國子博士監在京權貨務三門發運判官 按歐陽修爲元誌墓但云三司使言公材以主權貨不云爲三門發運判官也

進金部特賜進士出身 按元由任子入官以會計特賜進士非常格也

旣而元欲專六路財賦 六路者江南東路江南西路淮南路兩浙路荆湖北路荆湖南路也

鍾離瑾傳

攷異

宋史十一

三

後徙淮南轉運副使歷京西河東河北轉運使改江淮
制置發運使 按文潞公奏狀言轉運使有路分輕
重遠近之差河北陝西河東三路爲重路歲滿多任
三司使副或發運使發運任滿亦充三司副使成都
路次三路京東西淮南又其次江東西荆湖兩浙又
次之二廣福建梓利夔路爲遠小瑾自淮南京西移
河東河北改發運乃任三司戶部副使與潞公所云
正合

杜杞傳

父鎬蔭補將作監主簿 按東都事略杞爲鎬孫當云

以大父鎬蔭補

楊旼傳

保靜軍節度使重勛之曾孫 按史無重勛傳惟列傳
第三十二卷有楊美并州文水人官至保靜軍節度
使疑卽此傳所云重勛也旼稱楊業爲曾伯祖則美
與業蓋昆弟行

楊日嚴傳

河南人進士及第 按楊克讓之孫日嚴亦登進士第
官職方員外郎彼傳云同州馮翊人此云河南人兩
人同時又同姓名其兄同名日華疑本是一人祖貫

馮翊後徙洛陽爾

賈黯傳

以人茵噉之 茵讀如矢說文茵糞也

吳及傳

建請擇館職分校館閣書并求遺書于天下語在藝文

志 按藝文志不載吳及奏議

楊億傳

卒年五十七 東都事略作年四十七億嘗代寇準草

奏請皇太子親政斥丁謂姦邪準既逐億亦以憂卒

景祐元年樞密使王曙上其事詔贈禮部尚書謚曰

文有司言故事非嘗任二府及事東宮四品無贈官

仁宗曰億爲國竭忠可拘常典乎此事傳所當載而

史失之億官工部侍郎秩四品

樂黃目傳

又撰學海搜奇錄四十卷 藝文志作六十卷黃目父

子撰述志所載者不及其半蓋志傳之文多不相應

楊覃傳

唐有京兆尹憑居履道坊僕射於陵居新昌坊刑部尚

書汝士居靖恭坊時稱三楊皆爲盛門而靖恭尤著

按覃與大雅皆虞卿之後所述世系兩傳略同而

此篇尤冗史家失於刪併由不出一人之手也三楊之目乃唐代故事而宋史載之失限斷之例矣

昭宗朝以兵部員外郎使吳越 楊大雅傳及唐書宰相世系表並作刑部員外郎

楊允恭傳

請建大庾縣為軍官輦鹽市之詔建為南安軍 按地理志淳化元年以虔州大庾縣建為軍據此傳似在太平興國間

巢廬江二縣舊隸廬州道遠多寇民輸勞費允恭請以二縣建軍詔許之以無為為額 按地理志太平興

國三年以廬州巢縣無為鎮建為軍以巢廬江二縣來屬據此傳似在淳化以後

王曾傳

舊用郎中官判大理寺帝欲重之特命曾且謂曾曰獄重典今以屈卿 按是時曾以右正言知制誥兼史館修撰正言官從七品尚在郎中之下其後再遷纔得主客郎中而此時轉以判寺為屈何耶蓋宋時宰執之下即以兩制為華選知制誥與學士對掌內外制地望清華不與它官校品秩以侍從充郎官差遣故云屈也按閣門儀制大宴知制誥與尚書丞郎同

行見宋朝事實朝會班知制誥在祕書監光祿衛尉太僕

大理諸卿之上史所載寧登瀛不為卿寧抱槩不為

監之諺正謂此爾

皇祐中仁宗為篆其碑曰旌賢之碑大臣賜碑篆自曾

始春明退朝錄皇祐中王侍郎子融守河中還以

唐明皇所題裴耀卿碑額上之仁宗遂御篆賜沂公

碑曰旌賢其後踵之者懷忠呂許公顯忠李忠武旌忠寇萊

公全德元老王太尉教忠積慶文潞公親賢李侍中褒

親齊國獻穆公主旌功曹襄悼舊學晏元獻崇儒丁文簡舊德張鄧

顯先積慶趙中令旌忠懷德張侍中儒賢高文莊褒賢范

正思賢劉丞相沈清王武恭旌忠元勳狄武襄褒忠陳恭純

孝張文英宗御篆忠規德範宋元憲上御篆淳德守正

穆呂文穆大儒元老賈魏公今攷宋史呂夷簡寇準王旦李

用和曹利用晏殊張士遜范仲淹劉沆陳執中宋庠

賈昌朝傳皆載賜額與宋敏求所記合而它傳則遺

之又按杜大圭名臣琬琰集所載仁宗御篆程琳碑

額曰旌勞神宗篆高瓊碑額曰決策定難顯忠基慶

哲宗篆趙抃碑額曰愛直韓絳曰忠弼孝宗賜韓世

忠曰中興佐命定國元勳吳璘曰安民保蜀定功同

德傳皆失書丁文簡者度也高文莊者若訥也王武恭者德川也狄武襄者青也張文孝者

也觀

張知白傳

罷為刑部侍郎翰林侍讀學士知大名府 春明退朝
錄祖宗時宰相罷免唯趙令得使相餘多本官歸班
參樞亦朕天禧中張文節始以侍讀學士知南京天
聖中王文康曙以資政殿學士知陝州自慶歷後解
罷率皆得職焉按次道舉張知白王曙兩人為執政
罷免加職出外之例若除職而留京師者則如至道
二年錢若水自同樞除集賢院學士判院事咸平元
年夏侯嶠自樞副除翰林侍讀學士皆實履其職景

德二年王欽若自參政除資政殿學士亦居京師奉
朝請非外任也宰輔表王曙罷參政出知鄆州在明
道元年七月而宋云天聖者本天聖十年其十一月
方改明道也

晏殊傳

宰相寇準曰殊江外人帝顧曰張九齡非江外人邪
宋初南人罕登貴仕治平以前拜相惟丁謂晏殊章
得象曾公亮四人自王介甫後南人入相者浸多矣
寇丁之隙亦起於南北分黨萊公固賢相未免有意
排抑南人

呂夷簡傳

帝始與夷簡謀以張耆夏竦皆太后所任用者也悉罷之退告郭皇后后曰夷簡獨不附太后邪但多機巧善應變耳由是夷簡亦罷及宣制夷簡方押班聞唱名大駭不知其故而夷簡素厚內侍副都知閻文應因使爲中訶久之乃知事由皇后也 此事又見宦者傳

韓琦傳

慶曆二年與三帥皆換觀察使范仲淹龐籍王洙不肯拜琦獨受不辭 按是時范仲淹帥環慶除邠州觀

察使龐籍帥鄜延除延州觀察使王洙帥涇原除涇州觀察使琦所受者必秦州觀察使也仲淹籍傳俱云辭觀察不拜獨洙傳不書辭不肯拜亦踈漏常平使者散青苗錢琦亟言之帝出其疏以示宰臣曰琦真忠臣雖在外不忘王室朕始謂可以利民今乃害民如此且坊郭安得青苗而亦強與之乎安石勃然進曰苟從其欲雖坊郭何害明日稱疾不出 此事又見食貨志

王琪傳

徙知江寧 按景定建康志嘉祐二年二月尚書工部

郎中龍圖閣待制王琪知府事三年八月琪除知制
誥就移知蘇州五年二月工部郎中知制誥王琪再
知府事四月移知陳州傳祇載知江寧一任餘並失
書戈甫襄云王珪兄名琪王德
子亦名琪一文臣一武臣也

文彥博傳

自澶州商湖河穿六滌渠 河渠志湖作胡滌作塔塔
滌同音吳中復蔡挺傳亦作六滌

遂加彥博兩鎮節度使 兩鎮者河東及永興軍也

韓維傳

字持國 司馬光傳家集稱其字曰秉國溫公父名池

與持同音故易之

熙寧二年遷翰林學士 按石林燕語韓門下維以賜

出身熙寧末特除翰林學士崇寧中林彥振賜出身
用韓例亦除翰林學士國朝以來學士不由科第除
者惟此二人彥振謂攄也今攄傳書賜進士第而維
傳不書賜出身亦史文之闕

包拯傳

知天長縣有盜割人牛舌者主來訴拯曰第歸殺而鬻
之尋復有來告私殺牛者拯曰何爲割牛舌而又告
之盜驚服 按穆行傳調華池令民牛爲仇家斷舌

而不知何人訟于縣行命殺之明日仇以私殺告衍
曰斷牛舌者乃汝邪訊之具服此二事正相類

歐陽修傳

左遷知制誥知滁州 此據四朝國史本傳之文然知
制誥非左遷之官以歐陽年譜及文集攷之是時修
方以龍圖閣直學士充河北轉運使坐孤甥事落直
學士罷轉運使仍帶右正言知制誥出知滁州耳
時在外十二年矣 按修以慶歷四年甲申自諫院出
爲河北轉運使至至和元年甲午服除赴闕實十有
一年史云十二年者誤

劉敞傳

奉使契丹素習知山川道徑契丹導之行自古北口至
柳河回屈殆千里欲夸示險遠敞質譯人曰自松亭
趨柳河甚徑且易不數日可抵中京何爲故道此譯
相顧駭愧曰實然但通好以來置驛如是不敢變也
按閣詢傳使契丹時契丹在靴淀迂者王惠導詢
由松亭往詢曰此松亭路也胡不徑葱嶺而迂枉若
是豈非夸大國地廣以相欺邪惠慚不能對此二事
亦相類

曾鞏傳

改異

宋史十一

上

建昌南豐人 按曾致堯傳云撫州南豐人攷宋初南豐已隸建昌軍矣當從鞏傳鞏爲致堯之孫致堯傳失書孫鞏自有傳鞏傳又不言其祖於史例爲疏漏矣

王鞏傳

從蘇軾游軾知滁州 滁當作徐

登黉山吹笛飲酒 黉山本桓山史家避諱改

宋史十一終

宋史十二

廿二史攷異七十八

錢大昕學

陳襄傳

嘗訪人材之可用者襄以司馬光韓維呂公著蘇頌范純仁蘇軾至于鄭俠三十三人對 今蘇州府學有石刻熙寧經筵薦士章藁題云樞密直學士尚書右司郎中兼侍讀臣陳襄上進三十三人者端明殿學士右諫議大夫集賢院修撰提舉西京嵩山崇福宮司馬光端明殿學士翰林侍讀學士尚書吏部郎中知許州韓維翰林侍讀學士寶文閣學士尚書戶部

侍郎提舉西京嵩山崇福宮呂公著祕書監集賢院
學士知杭州蘇頌右司諫直集賢院孫覺尚書祠部
員外郎祕閣校理知齊州李常尚書兵部員外郎直
集賢院知和州范純仁尚書祠部員外郎直史館權
知河中府蘇軾尚書祠部員外郎集賢校理權知洪
州曾鞏尚書祠部員外郎集賢校理同修起居注孫
洙祕書丞集賢校理史館檢討王存太子中允館閣
校勘判武學顧臨祕書省著作佐郎集賢校理知太
常禮院林希太子中允館閣校勘簽書應天府判官
廳公事劉摯太常博士崇文院校書勾當宗正丞公
事虞太熙太子中允監西京洛河抽稅竹木務程顥
太子中允權發遣淮南西路轉運判官公事劉載殿
中丞新差充秦鳳熙河路措置邊事司勾當公事兼
催督軍須薛昌朝祕書省著作佐郎前崇文院校書
張載權興國軍節度掌書記見磨勘蘇轍前台州司
戶參軍召試館閣孔文仲新差歙州軍事推官吳貴
前潤州延陵縣令吳恕尚書屯田郎中知開封府太
康縣事林英尚書都官員外郎監泗州河南轉般倉
孫奭祕書省著作佐郎監揚州糧料院林旦太常博
士新差監衡州在城鹽倉鄒何尚書右司郎中分司

南京李師中尚書兵部員外郎傅堯俞太常博士新
差河東路提點刑獄公事胡宗愈前祕書省著作佐
郎王安國太子中允降授大理評事唐垌前光州司
法參軍監安上門英州安置勒停鄭俠也紹興元年
十一月詔以襄薦章寫示百僚并鏤版行下諸路此
事史亦失書

孫洙傳

尋幹當三班院 幹當本是句當史家避高廟嫌名追
改王師約傳同管當三班院楊佐傳幹當河渠司曾
孝蘊傳管幹發運司耀耀事王韶傳管幹秦鳳經略

司機宜文字韶子厚幹當熙河公事蕭注傳管幹麟
府軍馬傅堯俞傳趙繼寵越次管當天章閣林旦傳
幹當奏院宋球傳幹當禮賓院張整傳管幹馬軍司
宇文昌齡傳辟幹當公事汪藻傳遷江西提舉學事
司幹當公事外戚傳李評幹當三班院向傳範管幹
客省閣門皇城司宦者傳劉惟簡幹當延福宮李舜
舉歷幹當內東門御藥院講筵閣實錄院又爲廣西
幹當公事高居簡幹當御藥院蘇利涉幹當御藥院
又幹當皇城司姦臣傳蔡確管幹右廂公事選舉志
管幹御藥院使臣又戶部幹官麴院權稅務將作監

管幹公事職官志樞密院篇神宗以存等皆館職不
欲令承旨提舉詔改為管幹戶部篇增置幹當公事
二員紹聖元年罷戶部幹當公事置提舉管幹官建
中靖國元年復幹當公事官二員司農寺篇熙寧四
年詔諸路提舉常平管幹官令提舉司保明計功賞
之六年置幹當公事官九年以幹當公事官所至輒
用喜怒罷之皇城司篇幹當官七人元豐六年詔幹
當皇城司元祐元年詔幹當官闕三年無過者遷秩
一等開封府篇左右廂公事幹當官四人經略安撫
司篇其屬有幹當公事崇寧五年詔河東同管幹公

邊安撫司公事台班篇管幹殿中省尚舍尚藥尚醞
尚輦尚衣尚食局幹當左右廂公事官觀篇自今並
依嵩山崇福宮舒州靈仙觀置管幹或提舉詔卿監
職司以上提舉餘官管幹又有以京官為幹當者職
田篇發運司幹當公事轉運司管幹文字提舉常平
倉司幹當公事蔡河許汝石塘河都大催綱管幹機
宜文字府界提點司幹當公事食貨志農田篇政和
六年立管幹圩岸圍岸官常平義倉篇詔諸路各置
提舉官二員以朝官為之管當一員京官為之河北
轉運司幹當公事王廣廉會子交子篇崇寧三年置

京西北路專切管幹通行交子所鹽中篇提舉江西常平張根管幹運淮鹽于江西茶下篇熙寧七年始遣三司幹當公事李杞入蜀又令茶場都大提舉視轉運使同管幹視轉運判官阮治篇以許天啟同管幹陝西阮治事天啟爲同管幹欲專其事諸路阮治自川陝京西之外並令常平司同管幹入內皇城使裴絢爲涇原幹當市易篇因命韶爲路帥司幹當兼領市易事詔在京市易幹當公事孫廸又詔三司幹當公事李杞等兵志鄉兵篇每五十頃爲一營差諸農事官一員幹當詔將隴山一帶弓箭手人馬別置

一將管幹每路各置幹當公事使臣二員嘗充巡檢或管幹本族公事保甲篇增同判一主簿二幹當公事十提舉司之幹當公事者訓練篇部隊將幹當公事凡三十九人軍甲篇始置軍器監屬有丞有主簿有管當公事馬政篇詔熙河路應縣鎮城砦關堡官並兼管幹給地牧事皆以幹代勾或以管代勾也神宗以後四朝國史成於淳熙之世故多追改字史家承其舊文未及改正爾

孟元傳

贈遂州觀察使 元有女孫爲哲宗皇后贈太尉曾孫

忠厚在外戚傳此傳皆失書

侍其曙傳

侍其曙字景升 史失其里居

祥符二年黎州夷人爲亂詔曙乘驛往招撫其酋首納款殺牲爲誓曙按行鹽井夷人復叛曙率部兵百餘生擒首領三人斬首數十級因上言蠻阻險拒命請必加討詔知慶州孫正辭環慶駐泊都監張繼勳領陝西兵同曙俱進所至皆降 按蠻夷傳大中祥符元年瀘州言江安縣夷人爲亂詔遣閤門祇候侍其旭乘傳招撫旭至蠻人首罪殺牲爲誓未幾復叛旭

因追斬數十級擒其首領三人二年旭言夷人恃巖險未卽歸服詔文思副使孫正辭等爲都巡檢使乃分三路入其境脅以兵威皆震懼伏罪兩傳一云黎州一云瀘州地名互異正辭官名一稱其寄祿官一稱其差遣非有異同其易曙爲旭則避英宗諱也曙乘傳招撫撫而復叛據蠻夷傳在祥符元年孫正辭等進討則在二年本傳俱以爲二年事似誤

王安石傳

自禮部侍郎超九轉爲吏部尚書 按職官志文臣叙遷之例禮部侍郎當轉戶部吏部左丞而後遞轉六

曹尚書故云超九轉

神宗欲命相問韓琦曰安石何如對曰安石爲翰林學士則有餘處輔弼之地則不可 此語已見琦傳

蔡挺傳

元豐二年薨 列傳書薨卒當有一定之例趙普文彥博王安石蘇頌皆宰相而書卒呂公弼蔡挺鄧洵武以執政書薨此可議也

王韶傳

蕃部俞龍珂 長編或作龍渴渴珂聲相近

沈遘傳

年四十 王安石撰墓志云年四十三

李大臨傳

定以初等職官超朝籍蠟憲臺 宋初選人寄祿官凡四等畱守節察判官節察掌書記支使防團判官畱守節察推官軍事判官謂之兩使職官防團軍事推官軍監判官謂之初等職官錄事參軍縣令謂之令錄軍巡判官司理司法司戶縣主簿縣尉謂之判司簿据職官志李定時爲秀州軍事推官故云初等職官而蘇頌及定傳俱云秀州判官則是兩使職官不當云初等矣頌大臨爭李定事詳見頌傳此文重出

白爭李定後名益重世并宋敏求蘇頌稱爲熙寧三舍人云 此語亦見蘇頌傳

呂夏卿傳

夏卿學長於史貫穿唐事 夏卿有唐書直筆新例一

卷

又通譜學創爲世系諸表 歐陽公新唐書宗室宰相

世系二表出於呂夏卿律歷天文五行志出於劉義

叟方鎮表出於梅堯臣能集衆人之長故較舊史爲

善

程師孟傳

程師孟字公闢吳人 師孟一見列傳第九十卷一見

循吏傳兩篇無一字異者循吏傳多兩字前後不檢照如此

又列傳第一百廿二卷李光傳末附見其子孟傳事

凡百十五字而第一百六十卷復爲孟傳立傳

司馬光傳

陝州夏縣人也父池天章閣待制 按呂公著父夷簡

陳執中父恕富直柔祖弼張鑑父藏英皆有傳故本

傳不書某縣人若戚綸父同文已有傳矣而同文傳

復書應天楚邱人應天府卽宋州韓琦父國華已有傳矣而

琦傳復書相州安陽人琦曾孫肖胄傳又書相州安

陽人司馬光父池已有傳矣而光傳復書陝州夏縣人曾布祖致堯兄鞏皆有傳矣而布傳復書南豐人孫瑜父奭已有傳矣而瑜傳復書博平人張燾父根已有傳矣而燾傳復書饒之德興人劉光世父延慶已有傳矣而光世傳復書保安軍人劉子羽父鞏已有傳矣而子羽傳復書建之崇安人楊存中父震已有傳矣而存中傳復書代州崞縣人胡世將曾祖宿已有傳矣而世將傳復書常州晉陵人徐俯父禧已有傳矣而俯傳復書洪州分寧人常同父安民已有傳矣而同傳復書邛州臨邛人沈晦祖邁已有傳矣

而晦傳復書錢塘人蔣芾曾祖之奇已有傳矣而芾傳復書常州宜興人畱正六世祖從效自有世家矣而正傳復書泉州永春人李壁父燾已有傳矣而壁傳復書眉之丹稜人孟琪父宗政已有傳矣而琪傳復書隨州棗陽人高文虎從父閔已有傳矣而文虎傳復書四明人王阮曾祖韶已有傳矣而阮傳復書江州人鄭望之父僅已有傳矣而望之傳復書彭城人吳潛父柔勝已有傳矣而潛傳復書宣州寧國人梅堯臣從父詢已有傳矣而堯臣傳復書宣州宣城人傅察從祖堯俞已有傳矣而察傳復書孟州濟源

人郭忠孝父達已有傳矣而忠孝傳復書河南人其子雍傳又云其先洛陽人邵伯温父雍已有傳矣而伯温傳復書洛陽人賈似道父涉已有傳矣而似道傳復書台州人苗傅祖授已有傳矣而傳復書上黨人上黨卽潞州此類皆可從省王廣淵除直集賢院光論其姦邪不可近昔漢景帝重衛綰周世宗薄張美廣淵當仁宗之世私自結于陛下豈忠臣哉宜黜之以厲天下此語已見廣淵傳請判西京御史臺歸洛光以端明殿學士翰林侍讀學士判雷臺元豐初提舉嵩山崇福宮傳皆失書

田夫野老皆號爲司馬相公光嘗除樞密副使雖辭不拜而當時猶以相公稱之蓋非兩府不得稱相公也

范鎮傳

超授直祕閣故事館閣校勘須遷校理乃得直閣邵亢自國子直講館閣校勘進集賢校理加直史館司馬光亦自國子直講爲館閣校勘加集賢校理改直祕閣是也鎮以校勘徑遷直閣故云超授

范百祿傳

對入三等范祖禹撰百祿墓志云國朝制策三等惟

吳育蘇軾及公三人

改吏部侍郎 墓志云右選官冗累歲乃得調既赴官而宗室許占射成資卽罷去爲筦庫者患之公奏請宗室員外置不獨恩厚公族且使在官無非次替移之怨此事本傳不書

范祖禹傳

字淳甫 一作純夫

蘇軾傳

歐陽修以才識兼茂薦之 按宋制科之目賢良方正能直言極諫爲一科才識兼茂明于體用爲一科二

蘇當日同舉直言極諫科潁濱志其兄墓亦云文忠以直言薦之傳云才識兼茂者誤也凡應制科者先就祕閣試論六首中格狀後天子親策之所謂祕閣試六論也

及試二論復入三等得直史館 按選舉志太宗以來凡特旨召試者於中書學士舍人院或特遣官專試所試詩賦論頌策制誥或三篇或一篇中格則授以館職據此傳則治平中召試館職惟試論二篇也 哲宗立復朝奉郎 軾知湖州日寄祿官爲祠部員外郎及官制行改後行員外郎爲朝奉郎軾始敘復元

官朝奉郎正當昔之祠部員外郎也

遂以本官知英州尋降一官 軾在定州為御史所論

落端明殿學士翰林侍讀學士兩職但以朝奉郎知

英州降一官者由朝奉降承議郎也杭揚頴定皆節

度州英則刺史州以差遣言之亦降兩三等

軾自元祐以來未嘗以歲課乞遷故官止于此 軾於

元祐中任禮部尚書從二品翰林學士正三品而寄

祿官止於朝奉郎纔正七品蓋京朝官雖有四年一

轉之法亦必申請吏部乃得之容齋三筆載神宗即

位以刑部郎中劉述今朝散大夫久不磨勘特命為吏部

郎中今朝請大夫兵部員外郎張問今朝請郎十年不磨勘特

遷禮部郎中今朝奉大夫東坡之久不遷官亦此類也

蘇轍傳

六年拜尚書右丞 宰輔表稱蘇轍自龍圖閣學士御

史中丞除中大夫尚書右丞本傳失書加龍圖閣學

士一節

已而復大中大夫 轍除右丞時轉官中大夫在門下

侍郎任內轉大中大夫傳皆不書蓋四朝國史於寄

祿官多略之史家因其舊文不復增益如此傳前無

轉官大中之文而後云降朝議大夫復大中大夫首

後昆

宋史十二

七

尾殊不相應矣

蘇頌傳

泉州南安人按蘇紳傳稱泉州晉江人此稱泉州南

安人曾肇撰頌墓志則云泉州同安人俱不合

大臨還侍從頌纔授祕書監大臨時爲天章閣待制

故稱侍從其時未改官制卿監在侍從之下也

及修兩朝國史及當作召据墓志召修國史提舉中

太一宮史局兼宮觀蓋始於此南渡後陸游以提舉

祐神觀兼同修國史亦用此例而職官志亦不之及

趙瞻傳

服除易朝請大夫知滄州按元豐寄祿格以朝請大

夫換前行郎中瞻於神宗初已官司封員外郎矣史

蓋失書轉郎中一節也元豐改官制後史家于寄祿

官多略而不書惟王存孫固趙瞻楊簡諸傳猶見一

斑爾

鄭雍傳

初邢恕以書抵宰相劉摯摯答曰有自愛以俟休復之

語排岸司茹東濟錄書示雍與殿中侍御史楊畏雍

畏釋其語曰俟休復者俟他日太后復辟也遂並以

此事論摯威福自恣乞罷之此事已見摯傳

陸佃傳

遂罷爲中大夫知亳州 按佃除執政時寄祿官已至
中大夫矣此乃以本官出知亳州耳宰輔表云依前
大中大夫與傳互異

陳師錫傳

調昭慶軍掌書記郡守蘇軾器之 是時軾知湖州昭
慶湖州節鎮額也

顏復傳

顏子四十八世孫也父太初以名儒爲國子監直講出
爲臨晉簿 當云父太初自有傳

陶節夫傳

晉大司馬侃之裔也 按史傳之例與碑誌不同文人
諛墓追溯得姓之始臚舉前代名賢以表世闕至于
史家宜存限斷高曾以上事隔先代雖譜牒分明亦
當芟汰宋史諸傳如劉溫叟云唐武德功臣政會之
後劉熙古云唐左僕射仁軌十一世孫劉載云唐盧
龍節度濟之六世孫王著云自言唐相石泉公方慶
之後張藏器云自言唐相嘉貞之後石揚休云唐兵
部郎中仲覽之後楊偕傳唐左僕射於陵六世孫李
諮云唐趙國公暉之後范仲淹云唐宰相履冰之後

薛映云唐中書令元超八世孫鮮于侁云唐劍南節度使叔明裔孫齊恢云唐宰相映之後郭申錫云自言唐代公元振之後石普云自言唐河中節度使雄之後張浚云唐宰相九齡弟九皋之後李燾云唐宗室曹王之後朱倬云唐宰相敬則之後魏元云唐丞相知古後杜莘老云唐工部甫十三世孫張運云唐宰相文瓘之後楊大異云唐天平節度使漢公之後陸九齡云八世祖希聲相唐昭宗韓溥云唐相休之裔孫羅處約云唐酷吏希夷之裔孫李邈云唐宗室宰相適之之後顏詡云唐太師真卿之後皆承用誌

狀之文未及刊削若依此例則蘇之出味道歐陽之出詢何以又不書也此篇叙陶氏而及東晉遙遙華

胄尤無謂矣司馬池傳自言晉安平獻王孚後楊單傳漢太尉震之後與此同

郭成傳

子浩紹興中為西邊大將至節度使當云子浩自有傳

趙挺之傳

贈司徒謚曰清憲挺之子明誠建炎初以祕閣修撰知江寧府移湖州史失書

平部辭典中為西邊天界至清製刺 當云平部自其

淳熙對

自天無階矣 詩單對黃太淑觀之與與此同

出歸可以又不書也此語妙則久而又東晉並發華

宋史十三

廿二史攷異七十九

錢大昕學

李綱傳上

尚書右丞許翰言綱忠義捨之無以佐中興會上召見

陳東東言潛善伯彥不可任綱不可去東坐誅翰曰

吾與東皆爭李綱者東戮都市吾在廟堂可乎遂求

去 此事又見許翰傳當去此存彼

後有旨綱落職居鄂州 按綱罷相在建炎元年七月

其落職在是年十月 落職者削觀文殿大學士之職也 鄂州居住在

是年十一月皆出殿中侍御史張浚之論劾史於浚

攷異

宋史十三

傳既諱而不言此傳但於罷相時一言浚劾餘亦略不及之蓋史家爲張護短非直筆也綱於洪芻陳沖輩皆爲救解而獨致宋齊愈於死固難免上下其手之嫌乃浚於綱罷相之後抨擊不已甚至指爲國賊又謂綱於蔡氏門人雖誤事亂政力加薦引非竄竊不足以靖天下而於汪黃之姦邪則緘口不言斯誠變亂黑白之甚者矣浚疏具載李心傳繫年要錄子故表而出之讀史者勿以其晚節之善而置之不論也

李綱傳下

贈少師官其親族十人 按宋史紀傳於東都九朝鯀簡尚爲有法南渡以後燕雜殊甚李綱固賢相其傳乃至兩卷毋乃太繁乎其謚忠定則傳仍漏而不書何也列傳第一百七十八宣繒李鳴復鄒應龍別之傑金淵第一百七十九張礪馬天驥朱熠饒虎臣戴慶烜沈炎第一百八十二趙與憲諸人但敘官階全無事實又何太簡乎蓋史於南渡七朝敘事不如九朝之密而寧宗以後又不如高孝光三朝之詳贍也

張浚傳

始粘罕病篤語諸將曰自吾入中國未嘗有敢撻吾鋒

改異

宋史十三

二

者獨張樞密與我抗我在猶不能取蜀我死爾曹宜
絕意但務自保而已兀術怒曰是謂我不能邪粘罕
死竟入攻果敗 按此語本之朱文公所撰行狀然
粘罕以天會十四年卒卽紹興七年也而吳玠破敵
乃在紹興元年其時粘罕尚無恙富平之戰粘罕亦
未入陝皆不可信李心傳云案諸書此時粘罕在雲
中實婁宿死行狀誤也

連日南軍小不利忽諜報敵兵大至顯忠夜引歸浚上
疏待罪 按袁桷跋外高祖史魏王尺牘云朱文公
作張忠獻行狀一出南軒之筆不過題官位名姓而

已後攷三敗事迹始悔昔年不加審覈歸咎南軒然
亦無及矣符離之敗陵陽李伯微甫載其事甚詳云
符離之役軍資器械失亡殆盡張魏公初聞之疑金
人踵至甚懼卽軍中解所佩魚遣歸朝官太平州通
判劉蘊古假朝議大夫使北求和僚吏有止之者乃
奏乞致仕又乞朝廷遣使孝宗不從旣而金人不復
南魏公乃謀再舉上亦不從及和議將成魏公持之
甚確左相湯慶公因白蘊古之事由是魏公遂絀李
與張俱蜀士史筆不敢有所隱避也 伯微心
傳字浚有恢
復之志而無恢復之才平居好大言以忠義自許輕

用大衆爲僥倖之舉故蘇雲卿料其無成史家以其子爲道學宗因於浚多溢美之詞符離之敗但云南軍小不利而已豈信史乎

呂頤浩傳

以知紹興府朱勝非同都督諸軍事勝非傳失書知

紹興府事

繫年錄勝非除知紹興府在五月戊子除同都督在七月辛巳復知紹興在八月壬辰改除經筵在是月戊戌史家以其未赴任故略之耳

給事中胡安國論勝非必誤大計勝非復知紹興府尋以醴泉觀使兼侍讀安國持錄黃不下頤浩特命檢正諸房文字黃龜年書行安國以失職求去罷之檜

上章乞留安國不報此事又見安國傳當去此存彼

韓世忠傳

始補進義副尉神道碑作守闕進義副尉守闕者未

正授之名也此二字不可省

轉進勇副尉神道碑作進武副尉

宣撫副使李彌大斬之神碑作宣撫使李綱

以功遷左武大夫果州團練使詔入朝除正任單州團練使正任者落階官也職官志凡未落階官者爲遙郡除落階官者爲正任靖康元年臣僚言遙郡正

任恩數遠絕自遙郡遷正任者合次第轉行今自遙郡與落階官而授正任直超本等正官是皆姦巧希進躡取乞應遙郡承宣使有功勞除正任者止除正任刺史從之世忠以遙任團練使當歷遙郡防禦觀察承宣使及正任刺史而後轉正團練使今就遷正任非常格也

時張遇自金山來降抵城下不解甲人心危懼世忠獨入其壘曉以逆順按呂願浩傳願浩單騎與世忠造其壘說之

授檢校少保武寧昭慶軍節度使武寧碑作武勝

孝宗朝追封蘄王謚忠武詔禮部尚書趙雄撰神道碑御書額曰中興佐命定國元勳之碑傳失書

劉錡傳

德順軍人劉仲武傳云秦州成紀人父子別傳而籍貫互異

吳璘傳

追封信王傳失書璘謚又乾道八年以子挺請立碑詔翰林學士王曠撰文賜額曰安民保蜀定功同德之碑傳亦不及之

楊存中傳

父震知麟州建寧砦金人來攻亦死于難 當云父震見忠義傳

存中既顯請于朝宗閔諡忠介震諡忠毅 按忠義傳

震諡恭毅王明清揮塵錄亦同此云忠毅疑誤也宗閔諡不見於忠義傳當移此就彼

郭浩傳

順德軍隴干人 順德當作德順郭成傳云德順中安堡人與此傳地名小異

王德傳

再贈少傅二子琪順亦以驍勇聞 德諡威定贈至太

師琪官武康軍承宣使主管殿前司公事皆見景定建康志德第三子琪名見忠義傳史譌琪為拱又不云德子皆疎漏也

張憲傳

飛愛將也 飛上脫岳字憲與楊再興牛皋胡閔休俱當附岳飛傳刊修者改其次第未及訂正爾憲再興兩傳俱不著里居

曲端傳

婁宿攻陝西 婁宿即婁室也室宿聲相近

趙密傳

太原清河人

清河當是清源之譌

胡世將傳

賜三品服

宋初承唐制三品以上服紫五品以上服

緋元豐官制大中大夫從四品即服紫朝奉大夫從

六品即服緋與唐制異矣史家以賜紫為三品服賜

緋為五品服蓋失其實

馮澥傳

靖康元年澥為左諫議大夫

是時欽宗懲王安石蔡

京之誤國政事悉以仁宗為法澥上言仁宗陛下之

高祖也神宗陛下之祖也子孫之心寧有厚薄王安

石司馬光皆天下之大賢其優劣等差自有公論願

無作好惡允執厥中則是非自明矣詔賜諸朝堂侍

御史李光駿之不聽復為右正言崔鷗所擊宰相不

復問而遷澥吏部侍郎其在崇寧中首上書請廢元

祐皇后自選人除寺監丞

見容齋隨筆

傳皆諱而不書失

懲惡之旨矣

請廢后事雖附書於錢適傳而本傳絕不一及且云登進士第歷官入朝以言

事再謫似入官以來言行無玷者豈非變亂黑白之甚者乎

王倫傳

帝使倫謂左副元帥昌曰

此傳前稱左副元帥昌後

稱撻懶撻懶即昌也宋汝為傳前稱完顏宗弼後稱

兀术兀术卽宗弼也

金欲以倫為平灤三路都轉運使倫曰奉命而來非降也 按金史本傳以倫為平州轉運使倫已受命復辭遜上曰此反覆之人遂殺之與宋史異倫既恥事二姓甘以身殉豈有先已受命之理當從宋史為正文 宇文虛中傳

淳熙間贈開府儀同三司謚肅愍 按虛中與王倫俱奉使為金人所殺宋金二史各為立傳但虛中仕金已久雖以不忘故國獲禍究宜入於金史倫則宋之純臣卽列之忠義亦無媿詞斷不應附於金史也

尹穉傳

字少稷建炎中與自北歸南 傳失書其里居

洪皓傳

紹興十二年七月見於內殿 按皓於建炎已酉出使

留金十五年其歸當以紹興十三年癸亥傳云十二

年者誤 戈宙襄云案繫年緣紹興十三年六月金人遣皓還行在七月戊戌引見內殿

洪遵傳

知隆興二年貢舉拜同知樞密院事 按宋自治平以

後三歲一科舉隆興二年非貢舉之歲蓋元年之誤

樓鑰傳隆興元年訶南宮策偶犯舊諱知貢舉洪遵

奏得旨以冠末等其證也遵入樞府在元年五月亦非二年事

洪邁傳

六年除知歙州按中興學士院題名乾道四年邁自直院除集英殿修撰宮觀蓋自禁林罷職予祠復起知州史失載奉祠一節

十一年知婺州遷敷文閣待制明年召對以提舉佑神觀兼侍講同修國史進敷文閣直學士直學士院十三年九月拜翰林學士按傳先書乾道二年三年六年以次及十一年十三年然乾道紀元止於九年

不得有十一年十三年也攷中興學士院題名淳熙十三年四月洪邁以敷文閣直學士兼直院九月除翰林學士又容齋隨筆云淳熙十二年邁自婺召還又云淳熙十四年當作十三年九月予以雜學士拜翰林學士則史所云十一年十三年者實淳熙之十一年十三年矣

淳熙改元進煥章閣學士知紹興府淳熙當爲紹熙之譌容齋隨筆云紹熙元年予自當塗徙會稽過闕者是也攷學士院題名邁以淳熙十五年四月由翰林學士差知鎮江府又太平州瑞麻贊作于己酉八

列傳 九
月云予假守十閱月則是十五年之冬由鎮江移知
太平州至紹熙改元移紹興府除授次第班班可攷
本傳皆缺而不書又誤紹熙爲淳熙失之甚矣

明年再上章告老進龍圖閣學士尋以端明殿學士致
仕是歲卒年八十 据傳文似淳熙二年告老卽以
其年卒今攷之不特淳熙字誤卽謂卒于紹熙二年
亦誤也容齋三筆成於慶元二年六月其序云予從
會稽解組還里于今六年年齡之運踰七望八則是
慶元二年丙辰邁年尚未盈八十也据續筆云乾道
己丑年四十七邁旣壽至八十其卒當在嘉泰二年

壬戌矣

富直柔傳

故事簽書有以員外郎爲之而無三丞爲之者中書言
非舊典時直柔爲奉議郎乃特遷朝奉郎自是寄祿
官三丞除二府者遷員外郎自直柔始遂爲例 予
按元豐寄祿格以朝奉郎換後行員外郎以奉議郎
換太常祕書殿中丞 所謂三丞也 直柔時爲奉議郎當昔
之三丞故中書以爲非例因特遷兩官自後以奉議
除兩府者皆遷朝奉郎由直柔始也元豐以後員外
郎三丞皆爲職事官不以寄祿中書所引故事乃元

豐以前名目非南渡後名目傳乃云自是寄祿官三丞除二府者遷員外郎似南渡尚以三丞員外郎寄祿誤甚矣石熙載以太平興國四年正月自右補闕為兵部員外郎樞密直學士才七日簽書院事見容齋四筆此員外郎簽書樞密故事也

上虞縣丞婁寅亮上書言宗社大計欲選太祖諸孫伯字行下有賢德者視秩親王使牧九州以待皇嗣之生退處藩服疏入上大歎悟直柔從而薦之召赴行在除監察御史 寅亮已自有傳此文重出

潘良貴傳

會戶部侍郎向子諲入見語言煩褻良貴故善子諲是日攝起居立殿上徑至榻前厲聲曰子諲以無益之談久煩聖聽子諲欲退高宗顧良貴曰是朕問之又諭子諲且款語子諲復語久不止良貴叱之退者再高宗色變閣門併彈之 此事又見子諲傳

向子諲傳

臨江人敏中元孫 敏中開封人南渡後子孫遷居臨江蔡襄仙游人而後徙居雪川蔡光傳任伯兩眉州人而其後居邵武任希夷傳劉摯東光人而其後居龍游劉甲傳

李朴傳

翰林承旨范純禮 按純禮傳嘗爲樞密都承旨非翰
林承旨也

楊愿傳

愿字原仲 史失書其里居李心傳繫年錄云山陽人
句龍如淵傳

句姓本出古句芒高宗卽位避御名更句龍氏 按容
齋續筆政和中禁中外不許以龍天君玉帝上聖皇
等爲名字於是毛友龍但名友葉天將但名將樂天
作但名作句龍如淵但名句如淵衛上達賜名仲達

葛君仲改爲師仲方天任爲大任方天若爲元若余
聖求爲應求周綱字君舉改曰元舉程振字伯玉改
曰伯禹然則如淵本是句龍氏政和中回避去龍字
南渡避高宗嫌名復其舊耳廣韻句當字與句姓並
與構同音句龍之句則平聲故無嫌也句芒字經典
亦讀古侯切唯華陽國志云王平句扶張翼廖化並
爲大將軍時人曰前有王句後有張廖此句字乃是
去聲傳云出句芒者疑非其實句濤亦蜀人仕高宗
朝獨不改姓史未詳其故

卽擢如淵中司 中司者御史中丞也此流俗之稱不

當用之正史

陳俊卿傳

殿前指揮使王琪 琪德之子

子五人必有志於學終承奉郎朱熹為銘其墓必自有傳 當云子必自有傳

錢端禮傳

拜端明殿學士簽書樞密院事 史失書賜進士出身

宋制非進士而入兩府者必先賜出身

孫象祖嘉定元年為左丞相自有傳 今宋史無象祖傳蓋史臣初擬立傳而後缺之王安節傳云簡度使

堅之子呂文信傳云文德之弟似堅文德亦有傳而史無之南渡七朝事多疏漏不及前九朝之完善由于程限迫促草草成書不暇檢照也

劉琪傳

殿前指揮使王琪被旨按視兩淮城壁還密薦和州教授劉甄夫上諭執政召之琪請曰此人名位微何自知之上以琪告 此事又見陳俊卿傳俊卿與琪同時執政而琪在西府琪之罷斥琪當有力焉史家推美俊卿亦載此節宜去彼存此

范成大傳

除吏部郎官言者論其超躐 按周必大撰神道碑云
除吏部員外郎言者以不先攝爲超遷蓋當時除郎
官率先權而後兼然後正授故以不先攝爲超躐也
紹熙二年加大學士四年薨 碑稱紹熙三年加資政
殿大學士知太平州下車踰月請祠祿復得洞霄而
歸傳失載知太平一節紀年亦互異

李燾傳

除兵部員外郎兼禮部郎中 按周必大撰燾神道碑
云除兵部郎中以父諱下行員外郎又兼禮部其云
兼禮部者兼員外郎也碑又云十二月正除禮部員

外郎此傳兩書郎中皆誤

律歷志稱禮部
員外郎李燾

時乾道新歷成燾言歷不差不改不驗不用未差無以
知其失未驗無以知其是 此語又見律歷志

進祕閣修撰權同修國史權實錄院同修撰 按中興
館閣錄李燾以淳熙三年正月除祕書監兼權同修
國史兼權實錄院同修撰此不書祕書監而書祕閣
修撰誤也祕書監正官也祕閣修撰外任帶職也燾
旣爲祕書監不當更帶此職

尤袤傳

遷江西漕 按宋人稱轉運爲漕司或使或副使或判

官視其資歷淺深授之依史例當稱江西轉運某官
此云江西漕乃案牘之文不合史法李椿傳移湖北
漕劉光祖傳將漕利路徐邦憲傳除江西憲改江東
漕楊大異傳兼漕庾二司其失並同憲庾亦流俗之
稱憲者提刑也庾者提舉常平也

宋史十三終

文政十三年

